

1TH - 1 TH - Kayan Bible - Baptist

UTF-8

clean draft

Draft: Aye Li Yah, Eh Lah, Htoo Htoo, Jan 2009

Team Review, Aye Li Yah, Eh Lah, Htoo Htoo, Barbara,

Community Check:

Advisor Check: Grace, Aye Li Yah, Eh Lah, Htoo Htoo, Barbara, 2010

Consultant check: Janice Stefaniw, Grace Chou, Aye Li Yah, Eh Lah,  
Htoo Htoo, Barbara, Dec 2010

Publishing: Mar 2011

*long table of contents text*

*short table of contents text*

**Book abbreviation**

Li The Sa La Nĩ a kahtĩ la ba

## **Li The Sa La Nĩ a kahtĩ la ba**

### **Tatai theingă**

Wein The Sa La Nĩ mwaĩ Kăn Ma Ke Dõ Nĩ Yă wein khau dò àò dõ Rõ Me tapain kală nulò. PõLu swaĩhtan dõ Wein Phĩ Lĩ Pi htaũdò lai daô àòhtan ta-aòblon la phon dõ Wein The Sa La Nĩ nulò. Dõ wein ũ a kaũ nu, pra dõ a cõ mwaĩ YũDaphao dõ a thayũ theingă YũDa a tabă a rĩkaĩ àò lahan nulò. Bă PõLu sailanrwaĩlan Bweca tahwă tangaõ bã pra thũ lahan a klă khă, tamaũhtan khyaôhtan ma-athā akhaucă, cõ ngĩ nu, YũDaphao thũ lahan sõn cõ ba năn dò htandido năn nulò. Akhaucă, PõLu Swaĩhtan dõ Wein The Sa La Nĩ dò lai dõ Wein Be Rĩ Yă nulò. Dò bã a laitaũ dõ Wein Ko Ri Thu khă, Ti Mo The lai tai ba năn dõ Wein The Sa La Nĩ ta-aòblon a rĩkaĩ nulò.

Akhaucă, PǒLu tyan Li The Sa La Nĩ a kahtĩ la ba dǒ Wein The Sa La Nĩ ta-aòblon phao aò cwaǐdò ka cǒ thaubyā thākaǐ dò ka htaôkhau htaô-ă a ngă nulò. PǒLu dahtònhtan Bweca dǒ Wein The Sa La Nĩ akhaucă nulò. Htǒdò, daô theinănhtan Wein The Sa La Nĩ ta-aòblon phao dǒ a ta-aòmaǔ lă a aòblondò anănthură khă nulò. Htǒdò, pra dǒ a yǔcein Bweca YeSyũ thũ lahan mwaǐ thũ rǐdò Bweca YeSyũ lailan blan nu, bă YeSyũ lailan blan khă, ka nũ ba tamaǔ thaplaǒ thakha cwaǐ ta-aũlan yaǒ aò nulò. Dò taicein ta-aòblon phao lahan a tahtu bakyădò Bweca YeSyũ a talailan blan a rĩkaǐ nulò. Dò thwanlũ ta-aòblon phao dǒ kaba ma tama bă anănthură aòhaũ Bweca YeSyũ talailan blan khă nulò.

### **Li The Sa La Nĩ a kahtĩ la ba a tapănphā**

Tatai theingă (1:1)

Tataikyũ dò tadahtònhtan (1:2-3:13)

Tasankăn bakyădò pra yǔcein a ta-aòmaǔ (4:1-12)

Tathwanlũ bakyădò Bweca YeSyũ talailan blan (4:13-5:11)

Tatai sankăn dǒ naòdwăn (5:12-22)

Tamangaǒ naòdwăn (5:23-28)

## **1**

<sup>1</sup> Wein The Sa La Nĩ ta-aòblon phao dǒ yǔcein Phă Bweca dò Bweca YeSyũ Khrĩ thũ lahan kǒ, khĩ PǒLu dò Sĩ La, Ti Mo The tyan li dǒ nathũ aò nulò. Takyũ tanibwan dò tapeǐn tadwăn aòdò nathũ ka.

**Tataikyũ Bweca dǒ The Sa La Nĩ**

**ta-aòblon phao ta-aòmaǔ dò tayũ**

<sup>2</sup> Pa taikyũ thayăn Bweca dỏ nathũ pũpra akhaucă nulò. Dỏ bã pa kwĩthabă pũ blan khă, <sup>3</sup> pa theinăn dỏ nathũ àomaũ macũ cwaĩ nathũ yũ, àdò ta-ai a tamacũ makũ thapřă přă dỏ tacipỏn a ceĩ a klaô dỏ tacipỏn YeSyũ Khrĩ a kaũ nulò.

<sup>4</sup> Thapũwai|thapũwai, prayaũcein tadau YeSyũ dỏ Bweca ai thũ kỏ, pa theingă dỏ Bweca nirauhtan nathũ nulò. <sup>5</sup> Mară tai mề, tathanaò thasaũ a rĩkaĩ dỏ pa sailanrwaĩlan ba nathũ nu, cỏ mwaĩ sĩ tamangaỏ yũ nukỏ. mwaĩmwaĩ, àdò Thā Cănsũ akrau ayaò nulò. Dỏ pa yũ dỏ tathanaò thasaũ a rĩkaĩ ỉ mwaĩ a mwaĩ a cỏn dỏ a ceĩ a klaô nulò. Nathũ theingă hỏ, bã pa àoblondò nathũ khă, pa àomaũ dỏ nathũ ngă thamă nulò. <sup>6</sup> Dỏ nathũ àomaũ macũ cwaĩ Bweca YeSyũ àomaũ dỏ pa àomaũ nulò. Nathũ kaỏ ba tasărai săphai blănmề, nathũ yũ Bweca tahwă tangaỏ àobwaỉdỏ tathanaò thasaũ dỏ Thā Cănsũ kaũ nulò.

<sup>7</sup> Akhaucă, nathũ htũhtan tanitũ raò dỏ prayũcein Bweca YeSyũ àò bã Kăn Ma Ke Dỏ Nĩ Yă dỏ A Khă Ya pũpra a ngă nulò. <sup>8</sup> Nathũ sailanrwaĩlantathanaò thasaũ a rĩkaĩ dỏ Kăn Ma Ke Dỏ Nĩ Yă dỏ A Khă Ya nulò. Bakyădỏ nathũ tayũ nu, haũhtan dỏ kalăn pũ kaũ dỏ pa kalăn tai cỏ àò pề nukỏ. <sup>9</sup> Pra ăpra tai bakyădỏ nathũ àò pỏnsaũkă pa thamă, nathũ bwai kaĩ tayòn tagan, ma Bweca dỏ a maũ dỏ a mwaĩ a cỏn a takhỉ tapra, <sup>10</sup> dỏ àohaũ YeSyũ a talailan blan a rĩkaĩ nulò. YeSyũ mwaĩ Bweca phaokhaũ dỏ Bweca daỏthamaũhtancein năn dỏ tathũ dỏ bã taciran a mỏnnũ laitaũ khă, anăn ka mapaũblu pa dỏ Bweca tathăhtan nulò.

## 2

**PỏLu a taphi tama bã Wein The Sa La Nĩ**

<sup>1</sup>Thapŭwai|thapŭwai, prayaŭcein tadau YeSyŭ thŭ kŏ, nathŭ theingă bă pa lai dŏ nathŭ à khă, cŏ htŭhtan takahŏn kahŏn nukŏ.

<sup>2</sup>Nathŭ theingă, bă pa à dŏ Wein Phŭ Lŭ Pi khă, ta ma sărai săphai dŏ ma tarau tapa pa nulò. Blănmè, Bweca phŭ pa tathaukhaŭ thăkhaŭ akhaucă, pra äpra mwaŭ htandidò pa blănmè pa tai ba nathŭ dŏ Bweca a tathanaò thasaŭ a rŭkaŭ nulò. <sup>3</sup>Bă pa sailanrwaŭlan dŏ tai sankăn nathŭ khă, pa cŏ àdò tabwaithă kamă, tanithŭ karăn dŏ takeŭ takaò nukŏ. <sup>4</sup>Cwaŭ Bweca bathă dŏ yŭ-an pa dŏ ka tai a tathanaò thasaŭ a rŭkaŭ nu, pa tai cwaŭ thanu nulò. Dò pa cŏ rwăn ma taba pralau a thă nukŏ. mwaŭmwaŭ, pa rwăn ma Bweca dŏ a theingă pa thau pa thă lapra a tabathă nulò.

<sup>5</sup>Nathŭ theingă dŏ pa cŏ dahtŏnhtan nathŭ kahŏn kahŏn dŏ pa cŏ àdò ta thayŭ thakaò dŏ a àdhu àbŭ nukŏ. Ta-ŭ Bweca theingă thalănthă nulò. <sup>6</sup>Pa cŏ rwăn dŏ nathŭ dŏ pra karu ka yan ba pa dŏ ka dahtŏnhtan pa nukŏ. <sup>7</sup>Cwaŭ pa mwaŭ YeSyŭ apratadaôphao phao nu, pa kwŭ nathŭ ta dŏ pa kaô nŭ ba da nulò. Blănmè, pa sanlan pa thă bă pa à dŏ nathŭ klă dŏ pa ukraŭ raò nathŭ cwaŭ maô ukraŭ raò a phao pică nulò. <sup>8</sup>Mwaŭdŏ pa bathau bathă dau nathŭ akhaucă, pa thămo thămyăn dŏ tasailanrwaŭlan ba nathŭ dŏ Bweca tathanaò thasaŭ a rŭkaŭ nulò. Khlŏndò ŭ, pa phŭlan thă dŏ nathŭ ngă nulò.

<sup>9</sup>Thapŭwai|thapŭwai, prayaŭcein tadau YeSyŭ thŭ kŏ, nathŭ ka theinăn, bă pa à dŏ nathŭ klă khă, pa ba mata sărai săphai dŏ mŏncă mŏnna cwaŭdò pa ka cŏ mapăn masă nathŭ nulò. Dò pa sailanrwaŭlan ba nathŭ dŏ Bweca tathanaò thasaŭ a rŭkaŭ nulò.

<sup>10</sup>Nathŭ theingă dŏ Bweca thalănthă theingă nulò. Ta dŏ pa ma ba nathŭ prayŭcein Bweca YeSyŭ nu mwaŭ tacănsŭ, tacŏn tacwan dŏ cŏ àdò takamă nukŏ. <sup>11</sup>Nathŭ theingă, pa paò nathŭ cwaŭ phă paò a phao nulò. <sup>12</sup>Pa mamo nathŭ thă, phŭkha phŭ-ă nathŭ dŏ tai sankăn

nathũ cwaĩdò nathũ ka aòmaũ kaô dò Bweca dỏ niraughtan nathũ dò k̄a nathũ dỏ a sũk̄an dò a taphu takr̄a nulò.

<sup>13</sup> Dò pa taikyũ thaȳn th̄a Bweca dỏ nathũ cỏ bwai pa tasailanrwaĩlan cwaĩ pralutahw̄a tangaỏ nukỏ. Mwaĩdỏ Bweca mata dỏ nathũ prayũcein Bweca YeSyũ a th̄a kaũ akhauc̄a, nathũ yũ cwaĩ Bweca tahw̄a tangaỏ a mwaĩ a cỏn nulò. <sup>14</sup> Thapũwai|thapũwai, prayaũcein tadau YeSyũ thũ kỏ, nathũ kaỏ ba tama s̄arai s̄aphai thũ lahan cwaĩ Bweca ta-aòblon phao aò b̄a K̄an YũDa dỏ bakȳadò YeSyũ Khr̄i thũ lahan nulò. Nathũ kaỏ ba tama s̄arai s̄aphai dỏ nathũ pramyỏ taỏ cwaĩ an̄anthũ kaỏ ba tama s̄arai s̄aphai dỏ a pramyỏ taỏ YũDaphao nulò.

<sup>15</sup> YũDaphao ỉ mathũ Bweca YeSyũ, pahw̄i thũ lahan dò manũ macĩ pa nulò. An̄anthũ cỏ ma cwaĩ Bweca tabath̄a dò mwaĩ pra ̄pra a didò ròkha nulò. <sup>16</sup> An̄anthũ khran kaĩ pa cwaĩdò pa ka cỏ sailanrwaĩlan ba pramyỏ karu dỏ Bweca tathanaò thasaũ a r̄ikaĩ dỏ ka nũ ba tak̄acein kaỏcein nḡa nulò. An̄anthũ ma talw̄a paũ takhòwè taũ Bweca ka ciran an̄anthũ nulò.

### **PỏLu thayũ taule blan th̄a dỏ**

#### **Wein The Sa La Nĩ ta-aòblon phao aò**

<sup>17</sup> Thapũwai|thapũwai, prayaũcein tadau YeSyũ thũ kỏ, pa ba aò lanpha yũ dò nathũ laplỏn phao nulò. Pa n̄ankaỏ aò yũ dò nathũ bl̄anmè pa aò thein̄an thaȳn nathũ akhauc̄a, pa ma thapr̄a pr̄a cwaĩdò ka sỏnlaỏ ba nathũ nulò. <sup>18</sup> Dò pa thayũ tautaũ th̄a dỏ nathũ aò akhauc̄a, khĩ n̄anpicataỏ rw̄an tau ̄ blan bl̄anmè tasũtana khau dau madidaò did̄an pa nulò. <sup>19</sup> B̄a Bweca YeSyũ lailan blan kh̄a, pa tacipỏn, pa tathanaò thasaũ dò pa kal̄an phikrau cú pa n̄an ka mwaĩ

tară? mwaï nathũ nulò. <sup>20</sup> Nathũ mwaï pa tathanaò thasaũ dò pa kalăn aòkrau cù nulò.

### 3

<sup>1</sup> Naòdwăn khă, pa kaõthau kaõthā cõ da pè mwaïdõ pa à lanpha yû dò nathũ akhaucă, pa bwaithā dõ pa ka aòkaï bã Wein A The <sup>2</sup> <sup>3</sup> dò pa daõlai Ti Mo The dõ nathũ aò nulò. Anăn mwaï pa thapũwaï| thapũwai, prayaũcein tadau YeSyũ dõ a mablon ta dò pa dõ Bweca ngă, bã pa sailanrwaïlantathanaò thasaũ a rîkaï bakyădò Khrī khă nulò. Anăn lai dõ ka phîkhau phî-ă nathũ cwaïdò nathũ thā ka cõ didaò didăn lapra la pra dò aòdò tayũceï nāklaô dõ takaõ ba tasărai săphai a kaũ nulò. Nathũ theingă dõ ta bwailan pa dõ pa ka kaõ ba tasărai săphai ỹ nulò. <sup>4</sup> Bă pa aòblondò nathũ khă, cwaï pa tai saũyaõ nathũ dõ pa ka kaõ ba tasărai săphai nu, kanaïkhă pa kaõ ba ywăn nulò. <sup>5</sup> Dõ ta tha-ũ akhaucă, khĩ bayôn dõ tanicwî nihtaô<sup>a</sup> ka nicwî nihtaô nũ nathũ dò pa tama ka htũhtan takahõn kahõn nulò. Akhaucă, khĩ kaõthau kaõthā cõ da pè dò daõlai Ti Mo The dõ nathũ aò cwaïdò ka theingă nathũ tayũ a rîkaï nulò.

<sup>6</sup> mwaïmwaï, kanaïkhă, Ti Mo The ceintaũ hõ dõ pa aò nulò. Dò anăn tai ba pa tathanaò thasaũ a rîkaï bakyădò nathũ aòklôn dõ tayũ dò ta-ai a kaũ, nathũ theinăn thayăn pa dõ tathanaò thasaũ a kaũ dò cwaï pa thayũ sõnlaõ nathũ nu, nathũ thayũ sõnlaõ thalănthă pa a rîkaï nulò. <sup>7</sup> Thapũwaï|thapũwai, prayaũcein tadau YeSyũ thũ kõ, bã pa kaõ ba tasărai săphai khă, pa nũ ba tathāmo dõ nathũ tayũ akhaucă nulò. <sup>8</sup> Dò nathũ mwaï aòcein aòklôn dõ Bweca YeSyũ a kaũ nu, pa ka nũ ba lei tathāmyăn dõ pa ta-aòmaũ a kaũ nulò. <sup>9</sup> Mwaïdõ pa nahaũ ba nathũ a rîkaï akhaucă, pa thanaò thasaũ dau dõ Bweca a **3.5** ‘Tanicwî nihtaô’ mwaï ‘tasûtana khau dau’ nulò.

langă dò dahtònhtan Bweca laõ cõ da nukõ. <sup>10</sup> Pa kwĩthabă thapřă  
pră Bweca pũ saũkhă, cwaĩdò pa ka laitaũ thă dõ nathũ àò nulò. Dò  
ka sõnlaõ ba thă nathũ dò ka mabā mabwaĩ nathũ tayũ YeSyũ a ngă  
nulò.

<sup>11</sup> Thanudò, pa phă Bweca dò Bweca YeSyũ ka pran ba pa khlai  
cwaĩdò pa ka laitaũ dõ nathũ àò saô ka. <sup>12</sup> Bweca ka makũ nathũ  
cwaĩdò nathũ ta-ai cũ dò ta-ai pra pũpra ka bāhtan bwaĩhtan cwaĩ pa  
ai nathũ saô ka. <sup>13</sup> Dò bă YeSyũ lailan blondò a lanăn khă, cwaĩdò  
nathũ ka àò sahtôn dõ Bweca langă<sup>b</sup> cwaĩ pra cãnsũ, cõ àdò takamā  
a ngă nu, Bweca YeSyũ ka ma saò nathũ thā saô ka.

## 4

### Ta-aòmaũ cwaĩ Bweca tabathā

<sup>1</sup> Thapũwai|thapũwai, prayaũcein tadau YeSyũ thũ, cwaĩ nathũ  
bakyădò Bweca YeSyũ nu, pa thwanlũ hõ nathũ dõ ka aòmaũ macũ  
cwaĩ Bweca tabathā nulò. Dò nathũ aòmaũ macũ hõ. Blănmè, cwaĩdò  
nathũ ka rwăn aòmaũ macũ ähtan khlõn mõ nu, kanaĩkhă, pa tai  
sankăn thă nathũ nulò. <sup>2</sup> Mară tai mè, nathũ theingă tayũkhlai  
yũkhlõn dõ pa thwanlũ nathũ ũ, dõ Bweca YeSyũ akrau ayaò nulò.

<sup>3</sup> Bweca thayũ dõ nathũ ka aòmaũ blĩblăn dò swaĩrei talankamā  
mukhaũ nulò. <sup>4</sup> Thanudò, nathũ pũpra ka põnceĩ taõ nathũ nãnkaõ  
dò aòmaũ dõ tablĩ tablăn dò taphu takřă ka. <sup>5</sup> Cõ ma phaiya a  
tathayũ thāeĩ cwaĩ pra cõ yũ Bweca a ta-aòmaũ numă. <sup>6</sup> Bakyădò tarĩ  
takaĩ ũ, cõ ba htandido tamālan dò makamā ta dõ nathũ thapũwai|  
thapũwai, prayaũcein tadau YeSyũ prayũcein Bweca YeSyũ a kakhau

b **3:13** Dõ Li Cãnsũ karu mè, tamangaõ dõ pa tyan cein ‘Bweca lanăn’  
ũ tyan cein dõ ‘Bweca a pra Cãnsũ’ nulò.

numă. Dò pa tai theinăn nathũ saò saò dỏ Bweca ka ma ceinsaũ năn cwaĩ a makamā ta nulò. <sup>7</sup> Mară tai mề, Bweca nirauhtan pa dỏ tablĩ tablăn a ngă dò cỏ mwaĩ dỏ ta cỏ raũ cỏ căn a ngă nukỏ. <sup>8</sup> Akhaucă, pra dỏ a lăkaĩ tathwănlũ ỉ, cỏ mwaĩ a lăkaĩ pralau nukỏ. mwaĩ a lăkaĩ Bweca dỏ a phĩ nathũ Thā Cănsũ lapra nulò.

<sup>9</sup> Bakyădò nathũ ai nathũ thapũwai pra dỏ a yũcein Bweca YeSyũ lapra dò lapra nu, pa kalăn tai cỏ àò pề nukỏ. Mară tai mề, Bweca thwanlũ hỏ nathũ nulò. <sup>10</sup> Khlỏndò nu, nathũ ai nathũ thapũwai| thapũwai, prayaũcein tadau YeSyũ pra dỏ yũcein Bweca YeSyũ àò bã Kăn Ma Ke Dỏ Nĩ Yă kalăn ă kaũ nulò. Blănmề, thapũwai|thapũwai, prayaũcein tadau YeSyũ thũ kỏ, pa tai sankăn nathũ dỏ nathũ ka ai cũ ăhtan khlỏn mỏ nulò. <sup>11-12</sup> Aỏrỉ àòràò ka. Ta dỏ cỏ bakyădò nathũ mề, cỏ madidaò didăn ngòn ka. Dò ma taỏ nathũ tama thapră pră ka. Rwăn mata thũ lahan ỉ ka. Dò pra dỏ cỏ yũ Bweca ka yan ba nathũ nulò. Dò nathũ cỏ lo kanòn pề nathũ thā dỏ pra karu lapra la pra àò nukỏ.

### **YeSyũ a talailan blan**

<sup>13</sup> Thapũwai|thapũwai, prayaũcein tadau YeSyũ thũ kỏ, cwaĩdò nathũ ka cỏ tha-au thaplă manaĩdò pra karu dỏ a tacipỏn cỏ àò a ngă nu, pa thayũ daỏ theingă nathũ tamwai tacỏn bakyădò pra dỏ a thũ hỏ thũ lahan a rĩkaĩ nulò. <sup>14</sup> Pa yũ dỏ YeSyũ thũ htaũdò thamaũhtancein akhaucă, pa yũ thalănthă dỏ pra bakyădò YeSyũ dỏ a thũ hỏ nu, Bweca ka kăcein năn blondò YeSyũ nulò. <sup>15</sup> Pa thayũ tai ba năthũ cwaĩ Bweca YeSyũ a tamangaỏ nulò. Bă YeSyũ lailan blan khă, prayũcein Bweca YeSyũ dỏ a thũ hỏ ka sỏnlaỏ ba năn rỉdò pa, prayũcein Bweca YeSyũ dỏ àỏmaũ mỏ thũ lahan nulò. <sup>16</sup> Bweca ka mălan tamangaỏ, Bweca lanăn a khau dau ka kăkrỉhtan, Bweca a

kwai ka preinhtan dò bănu khă, YeSyũ aò dỏ mòkhau ka lailan nulò. Dò prayũcein Bweca YeSyũ dỏ a thũ hỏ ka thamaũhtancein rĩ  
<sup>17</sup> htaũdò Bweca ka phihtan cein pa, pra dỏ aòmaũ mỏ thũ lahan dỏ la-aũ klă bă mòkhau dò pa ka sỏnlaỏ ba Bweca YeSyũ blondò anănthũ nulò. Thanudò, pa ka aòblon thayăn dò Bweca YeSyũ nulò.  
<sup>18</sup> Akhaucă nu, phĩkhau phĩ-ă cũ dỏ tarĩ takaĩ ỉ nuka.

## 5

<sup>1</sup> Thapũwai|thapũwai, prayaũcein tadau YeSyũ thũ kỏ, bakyădò tarĩ takaĩ ỉ ka htũhtan bămă saũkhă nu, khĩ kalăn tai nathũ cỏ aò pè nukỏ. <sup>2</sup> Mară tai mề, Bweca a mỏnnũ <sup>c</sup> ka laitaũ pa bă pa cỏ cipỏn khă, manaĩdò prahu laitaũ bă mỏnna khă nu, nathũ theingă byan hỏ nulò. <sup>3</sup> Bă pra tai dỏ tamo takwĩ aò dò kalăn bayôn cỏ aò khă, tacakaĩ capyā ka lantaũ kyaỏ anănthũ cwaĩ pramu maỏdaỏ sảphao dò pra cỏ paũblu da lapra la pra nukỏ.

<sup>4</sup> Blănmề, thapũwai|thapũwai, prayaũcein tadau YeSyũ thũ kỏ, nathũ cỏ mwaĩ pra aò dỏ takhũ talao klă nukỏ. Akhaucă Bweca ka lailan a mỏnnũ nu, cỏ mwaĩ tathakyaỏ dỏ nathũ ngă cwaĩ prahu lai nukỏ. <sup>5</sup> Mară tai mề, nathũ cỏ mwaĩ mỏnna phao bakyădò takhũ talao nukỏ. mwaĩmwaĩ, pa mwaĩ mỏncă phao bakyădò takhă nulò. <sup>6</sup> Akhaucă, pa cỏ ba mĩkhlaũ cwaĩ pra karu dò anmaũ aỏplũ ta nukỏ. mwaĩmwaĩ pa ba bwaithā dò aò khyaỏthăn thayăn nulò. <sup>7</sup> Pra dỏ a mĩ nu, mĩ bă mỏnna dò pra dỏ a anmaũ aỏplũ ta nu, anmaũ aỏplũ bă mỏnna khă nulò. <sup>8</sup> Blănmề, pa nu, pa bakyădò takhă phao dỏ aòmaũ bă mỏncă akhaucă, bwaithā dò aò khyaỏthăn ka. Thaỏhtan tayũ dò

c 5.2 ‘Bweca a mỏnnũ’ mwaĩ ‘YeSyũ ka lailan blan a mỏnnũ dỏ ka ciran dò kăcein kaỏcein ta’ nulò.

ta-ai cwaĩ ännă tan dò daohtan tacipõn dõ bakyădò takācein kaõcein cwaĩ khauklũ htā ka.

<sup>9</sup> Mară tai mē, Bweca bwailan hõ pa cõ mwaĩ dõ pa ka kaõ ba a taciran ngă nukõ. mwaĩmwaĩ, dõ pa ka nũ ba a takācein kaõcein dõ Bweca YeSyũ akhaucă nulò. <sup>10</sup> YeSyũ thũ dõ pa ngă cwaĩdò bã a lailan blan khă, pa mwaĩ thũ mē htaũ, pa mwaĩ maũ mē htaũ, pa ka aõmaũ blondò anăn nulò. <sup>11</sup> Akhaucă, phĩkhau phĩ-ă cũ dò ma dauhtan ähtan cũ lei cwaĩ nathũ ma hõ nuka.

### **Tamālan dò tamangaõ raõrĩ a naõdwăn**

<sup>12</sup> Thapũwai|thapũwai, prayaũcein tadau YeSyũ thũ kõ, khauna aò bã nathũ klă dõ mata thapřă přă, cwĩkhilai aĩru nathũ dõ Bweca a kaũ dò thwanpaò nathũ nu, pa kwĩcică dõ nathũ ka theingă yan ba anănthũ nulò. <sup>13</sup> Mwaĩdõ anănthũ tama akhaucă, bwaidau dò ai anănthũ laõthau laõthā ka. Dò aòpeĩn aòdwăn cũ ka.

<sup>14</sup> Thapũwai|thapũwai, prayaũcein tadau YeSyũ thũ kõ, pa tai sankăn nathũ, thwanpaò pra dõ a thahyũn ma ta, phĩkhau phĩ-ă pra dõ a tharõn, makũ pra dõ a khausyan äcă dò khandhadõn pra pũpra ka. <sup>15</sup> Cõ masaũ pra dõ a makarăn nathũ lapra la pra numă. mwaĩmwaĩ, pũ saũkhă nu, maraò cũ dò maraò thalănthă pra karu pũpra ka.

<sup>16</sup> Thanaò thasaũ pũ saũkhă, <sup>17</sup> kwĩthabă lathăhteĩ, <sup>18</sup> dò dõ tama-athā pũ myăn a kaũ nu, taikyũ Bweca ka. Ũ mē mwaĩ taba Bweca a thā cwaĩ nathũ aò dõ YeSyũ Khrĩ a kaũ nulò.

<sup>19</sup> Cõ khran kaĩ Bweca Thā Cănsũ numă. <sup>20</sup> Cõ ma tarau tapa pahwĩ tasailanrwaĩlan numă. <sup>21</sup> mwaĩmwaĩ, masõn ta pũ myăn dò ta dõ a raò nu, phinũ ka. <sup>22</sup> Dò ta dõ a cõ raò pũ myan nu, swaĩrei ka.

<sup>23</sup> Bweca dǒ a phî tapeĩn tadwǎn lapra ka maphu mablǐ, macǎn masǔ nathǔ dǒ ta pǔ myan saô ka. Bǎ Bweca YeSyǔ lailan blan khǎ, cwaǐdò tabwai takamā dǒ nathǔ nǎnkhou ka cǒ aò a ngǎ, pǒn nathǔ thau nathǔ thā, nathǔ nǎnkaǒ ka. <sup>24</sup> Bweca dǒ nirauhtan nathǔ nu, mwaĩ Bweca dǒ a thācǒn dò ka mata cwaĩ a ta-aǔlan yǎlan nulò.

<sup>25</sup> Thapǔwai|thapǔwai, prayaǔcein tadau YeSyǔ thǔ kǒ, kwǐthabǎ ta dǒ pa ngǎ ka.

<sup>26</sup> Bǎ nathǔ nigǎ saũ cǔ khǎ, mangaǒ raǒrǐ cǔ dǒ ta-ai a kaũ ka.

<sup>27</sup> Dǒ Bweca YeSyǔ a myan kaũ, khǐ kwǐcicǎ nathǔ cwaǐdò nathǔ ka phāhtan li ǔ bǎ thapǔwai|thapǔwai, prayaǔcein tadau YeSyǔ pǔpra a langǎ nulò.

<sup>28</sup> Bweca YeSyǔ Khrī takyǔ tanibwan ka aòdò nathǔ saô ka.